
EDITOR REIKAH

Dawh thôhpa rachhôh ta ao paro ngaitapa ta Zisu aw ta, “Eli, Eli lama sabach-thani” “ Ei Khazohpa khazia eina pathlua chi ”. (Mathai 27:46).

Eima Beipa Zisu Kraws liata bie hnôh chaipa a reipa a châ tahpa thâtihpha Mathai châbu ta miah a chho. Chyhsa ahyrai ta eima kyhpachâpa tlâh leipa ta rakhô liata thina saikao kiah lia a zia thlâna daihti liata bie hnôh chaipa a reipa eima thei khoh chy sai. Eina chho pachhuaipa ei cha. Rev. Teitu he “ Centenary atlâhpa ta ” tahpa reih ta a hu a chhâ haw tahpa eina chho ei. Tahma taihta rohpady tyh nahta ei mothlihzy atla thla-hâ chy. Kyh ei pachâpa ei paw athina daihti lia deikua Biehraï siku lia y haw nahta abie rei hnôh chaipa thei hmâ khao v’na.

Tahma hlâ America Râh liata ama buabâ kheï chaipa, George Floyd he police zy ta patu ei ta abie rei hnôh chaipa cha “ Ei huso nâ daih khao vei ” tahpa a châ. Ano he movyhpâ châ ta, movyhpâ nata mongyuhpa pathluana vâta athipa a châ tah eita zawpi ta lâlai achhih eita “ ei huso nâ daih khao vei ” tahpa ama aw ngâpa a châ.

Zawpi vâtlâh viazy ta cha “ Ei Khazohpa, thi khoh thai beih v’na, chahrasala riethaina tao thei khao v’na, ei husona he na la hlâ bei la ” tahpazy tlyma, Ei châ lykaw ei’na” Nama nawhta, uhta zy kyh avaw pachâ khai ha mu vy ” tahpa biezy reipa ta khizaw ama vaw khô haw tyh. He hawhta thi chyta bie ama reipa ahnôh chaipa he pasô kaw tyh pita, my chhao my thai bei ma pi. Thina hnôh chaipa daihti chhao he zawpi ta cha ôh kheï pita ahyhmâ miah pahrua leipa ta eima raizy hnôhchhy khaipa ta ri akiah tyh pita, khih nôpâ lia sanawh rinôzy vaw tlô eita, eima taokhei pha hmeiseih. Pastorzy nata Awnanopa machâzy ta chakaona service pha kawpazy hnei eita, cha liata pawpi photo ta ari cha eima palyupalih tyh. Thina daihti he cha my thei leipa daihti châ tyh ta anodeikua cha mothlih hi beih leina daihti chhao a châ.

Covid-19 pasana deikua cha, kyhpachâ chaipazy hnohta bie hnôh chaipa rei awpa vaw pahneisa thei khao vei. Tahma he châ ei ro ngâhaina daihti liata khizaw râh zydua liata COVID-19 vâta athipa 445155 ama pha haw. He ta tlu ta sâ hluhpi zydua he bie hnôh chaipa chhao rei hma tlâ khao va ei. Ama tlâhleina daihti lia chhao ahy sanwh rinô chhao vai pasai leipa ama cha. Ama kyhpachâ saw nata lahpi avahpa chhao a kiahpâ lia ahnia awpa chhao pasaipa cha hra vei. Ama ri chhao kia pasai leipa eita, thi daihti liata palyupalihna chhao to thei khao va ei. Thokha cha y thei khao leipa ta ripabuna liata a hlao hawpa chhokhazy cha, maochhiepa ta y eita,

no (20) chhôn khopua leipa ta ama hrâih tyh. China râh liata chapaw hawti pakha cha “Ha hao kei paw ri na” tahpa ta akudy ta chakhi ta thata a cha nga tahpa thâtizy eima thei.

Viasa nata chhôhkha sawnaw rinô zy ta bie hnochaipa chhao chho thei khao lei, anô chhao bie hnochaipa rei thai khao lei ta miah a tao hawpa he Covid 19 he a châ. He ta tluta zohna tawhta zoh viana daihti a y thai khao bao va ma?

Covid 19 vâta khizaw miah a vaw khosai hawpa zy kha “Ei Khazohpa ei Khazohpa khazia eina pathlua chi” tahpa ta palôh keichheihpa ta ama aw thlyu nata ei pangiasa. Chahrasala akyhpachâpazy akiah lia y khao tlôh ei va, Khazohpa ahropa deita a ypâ thla ha ei.

Covid -19 he ta khizaw râh sawkha, mopakha chyuta miah pachhupatlaisa ngahaipa cha hneirôhnazy, Chariah chhaichhi phapazy, chhaichhi hiabâh taothaipazy nata bie hneinazy heta eima hrona he miah vai pahnie thei khao vei tahpa he a châ. He hriia heta eima hrona nata khihsana he thata miah apahao hmeisei. Niedo thlalôhna, alei phapa tawhta apuapa ahna, lasie nata niebaw toti nie thei awpazy nata a eih via chaita, alei (lyurahpa) pabohsana, chava chahaohzy pabohsana tlâhpadâ phapa nata thlihua pathaipazy nata hmohro hneipazy pabosana leipa ta eima hro he a vai thei khao hlei aw ma pi.

Eima hrona khizaw nata eima khihtlâh he Meithe i chhaichhi ta pabohsa thei hlei aw mapi. Politic bieheina heta vai thei hlei hra aw mapi. Kyhpachâna, akaoraohna, adeichhy veichana nata sasyh athôhna athlua leipa siana vati he eima khih tlâh liata loh bei maw sy. Cha hawhta a cha vei khiah “Ei Khazohpa, Ei Khazohpa khazia eina pathlua chi” eima tah pathlei awna.

Covid-19 heta hmoparaona raihria achâpa (chainsaw) ta tho maih kaw âh nazy, lyu râh khasia kho leinazy, chava lia ngazy acid hawpa dainazy tao khao leita eima râh chhaolei phapa tawhta nie nata baw he papua thei awpa ta miah pahao hmeiseih.

.....

KPP Day Bible Study (2020)

(Isai 58:12)

Rev. Dr. Vâkô

“Na tawhta apua awpazy châta su parahpa, pathaiparo chiehpazy cha tao pathi heih aw ei ta, chhâ hluhpi lôbôzy ta na paryh heih aw, nâ cha araopa a tao pathituhpa, chyhsa pahrana awpa ta lâpizy atao pathituhpa, a cha tah aw ei.” Isai 58:12

Biehmiapa reina

Hmo yzi siena hawhta reipa cha mawh sala, MEC awnanopa liata Krizyhpaz Pawzy Py he kô machâ chaipa cha sala nahkhao liata thei a ngia kaw aw. Chahrasala ano he kô hawti chaipa, atliata ta a vaw pihpa py a vaw cha pyly haw. Chata hra sala ano he chakaona koala tawhta ABeipa rai a hria viapa châ ta, he py he lei palie liata ku soh ta, hnohlâ aheihpazy cha leipa ei ta, hmialâ aheihpazy tloa ama cha. Atakô KPP adua noh liata bietlâh piepa ama vaw tupa he atanoh hmô yzie nata ahmie kawpa châ ta, keimo dyhkha ta ei pahasa kaw. Chyhsa tota he kyh he nama rei khoh chyua nata ei pangiasa. Hrosopa Isai sipahliepa ta Khazohpa ta Izarei sawzy hnohta areipa bie châ ta apha ngâsâ. Cha bie cha atahma Bible study hawhta eima pachâpazi tua aw.

Biehrai hnohkyh kyh

Hrosopa Isai châtu he chhâthoh ta pachhaih ei ta, bo khana tawhta bo 39 na taih he seichâna lâta ama sie hla tahpa duahmo kyh reina a châ. Bo 40 tawhta bo 55 taih he seichâna su liata ama y chhoh, moleina ama ro awpa apeimawhzi reina a châ. Bo 56 tawhta bo 66 taih he cha seichâna tawhta ama pua hawna daihti liata ama châna kyh reina a cha tahpa ta ama chhopasia. Chavâta atahma eima bietlâh he seichâ khai tawhta Izarei sawzy hnohta hrosopha Isai siepahleipa ta Khazohpa ta bie a reipa a châ.

Biehrai chhopasiana

Atanoh eima bietlah achhuahna eima pahno thei via n'awpa ta tlâh kha hnoh tlah kha, a chyua theina hawhta reipasiana eima hnei aw. Tlah khana tawhta tlah hrawh hleinona taih eima rei nata eima hmôpa hmo yzizy cha he hawhta a châ.

1. Khazohpa cha chôpho ta thlah ama chhâna a pahno (58:1-3) Zawpizy ta “Khazpa vâta eima thlahchhana he chyh-ei leipa ta eima y” ama tahpa eima hmô. Khapavâta e noh chareih keimo sasyh ta apanawh pi ta, na pahno tlôh vei ama tah tyh. Abeipa lata thapi aw ei ta, chiamie hawhta ao papua hra ei sala, ama ao cha Khazohpa ta thei hlei vei a tah. Chahawhta ama chana cha Khazohpa lâta ama moleina ama palâha tlôh leipa vâta achazie a reih (58:2)
2. Khazohpa cha chôpho ta ama chhyna apahno (58: 3-5). Nie leipa ta thlah ama chhâpa chhao ta amo chakaotuhpazy pasaipa-ipa ta ama taopa vâta nata (3) kâhvileipa ta thlahchha hra ei sala, a-ei, a chhiana lâta atlôkheipâ tyhpa a chapa vâta ano ama chhyna cha chôpho ta achâzie Khazohpa ta apahno. Chô lata pahno tlahpa ta thlahchhâ vei ei chi Khazohpa ta a tah. Pathipalôh hmeiseihpa ta na hnia veih ei chi a tah. Tao tyhpa hmo sâkha hawhta nama tao tyh thlyu aw. Ama thlahchhana nata ama chhyna cha chôpho ta a chazi kyh he hawhta eima chhopasia via heih tua aw. Izarei mo ta,
 - (a) Sei zy zuah ei ta, hneirohpa nata sipasapazy apathlua ei ta, ama pathipalôh chhoh liata apalaina ta abipa vâta a châ.
 - (b) Ama khopa hmo sakha kha vâta tlyma, ama pahnie khohpa vâta tlyma? Ama sapa khopa sâkha kha pi a tloh thei nawpa ta thlah ama chhapa vâta a châ.
 - (c) Sasyh apachônôsa nawpa ta thlahchha awpa châ leipa ta, Khazohpa moh rôhna nawpa châta tlao a châ awpa a châ.

Khazohpa alypa thlahchhâna

(6-7) Moleina ta chahryna tawhta pathlana, ama raopaky rizy pahluhna, pasaipa-ipayy papuana nata ama raopakyzy lana zy a châ.

- (a) Mo hropazy chôta nochhie kawpa ta taona chalihsa awpa nata cha hawhta mohropazy chôta hmophapa eima taona he Khazohpa ta eima zaona phana tlao a châ.
- (b) Mohropazy hnohta kyhpachâna ta chakao awpa a châ.
- (c) Rairuna atyh haipazy baona chhao a châ.

Khazohpa tawhta byhna âvyna

(58:8-11) chhoh liata hmeiseihna kyh ta Khazohpa achhytuhpazy chôta Khazohpa a bietaih byhnazy kyh he hawhta eima hmô.

Nochhi hawhta ama khaina vaw tlô aw ta, ama tlahna chhao a chatlie kawpa ta a vaw y aw. Siana chhaota sie aw ei ta, Khazohpa rôhnana cha ama kiahpâh ta a y aw. Cha tina chata Khazohpa aw aw eita, Khazohpa ta, “He liata ei y” a tah aw ei a tah.

(58:12) liata “Na pathlazy chata arao hawpa khihpi cha paryh aw ei ta, kô hluhpi a vaw y chyhpa su parohpazy kha pasah via lyma aw ei ta, nâ cha parao hawpazy paduatuhpa, chyhsazy siena lâpi paryhtupa ama cha tah aw” a tah.

1. **Taopathituhpa cha Khazohpa nata ama kao awpa a cha.**

Taopathina cha a rao haw chiehpa raihria a cha. Paraona rai he chyhsa moleipazy tawhta ahlukh via a pua tyh. Chyhsa phapazy tawhta hmo a raopa he achyh via. Hmoraopa paphasa heina rai chakaona he riaphana, apiepasaina nata thapasanazy chhaota chakao theipa a châ. Taopathituhpazy hrona liata riaphana, apiepasaina nata thapasanazy a y tyh. Chahawhpa chyhsazy cha Krista hrozi ahneipazy tluta châ ei ta, ngiapâtuha keimo zydua eima eih châ sala, eima laiseihna chhao a cha awpa a pha. Chahasala taopathina zydua he Khazohpa china ahlaio leipa khiahta cha apalaina lâta alie thai kaw tyh. Chavâta Khazohpa china nata zana chôta taopathina rai he chakao awpa a châ.

2. Taopathina rai cha hmaohkha chakaona a châ.

Biehraia liata thokha Khazohpa leipa ta taopathina rai ama hria tyh. Zakaw sahlao lâta Khazohpa palôhphao cha, apalaipa nata pathipalôh chapuachaluahpa ta “Beileitlo (Okhe) mei ta rao chiehpa cha cho hra sala, lô châpa daipa ta eima sa aw” tahpa ta ama palaipa vâta Suria nata Philistina mozy ta ama pala khai aw” a tah (Isai 9:10-12) Rei khohpa cha taopathina rai eima chakaona kyh liata eima nôpaw hmiatuapazy ama vaw duana tôtlahzy a chapa: siana, adona nata ngiapâna zy liata eima dua awpa a châ. Eima chakaona kyh liata chhao hmaokha ta eima chakao awpa a châ. Biesohzy 14:34 liata “Siana ta phopi parôhnasa ta, moleina deikua cha photo châta maochhiena a châ” a tah. Pakah ta chakaona hlâta palôh hmeiseihpa ta hmaohkha ta chakaona cha ABeipa tawhta byhnâ sôhpa a châ.

3. **Taopathina cha parao hawpazy paraihna raihria a châ.**

Vaduana tlyma, raokeina tlyma a y khai tawhta padua heihna rai he tha alana chôta hria awpa rai a châ. Izareil mo ta a rao hawpa ama khihpi padua pakhuana rai ama vaw hriana kyh liata ngiapâna nata siana liata a duah ei ta, hmaohkha ta ama vaw hria. Chavâta amo cha a rao hawpa lâpi ataopathituhpazy apapuatuhpazy ta raopa ama cha aw tahpa ta Khazohpa ta a tah (58:12)

Pachhâna

Hmâphaohpazy ama ngiahna cha doctorzy, nurse zy ta ama pahno chai aw. O raopa sapathi heih n’awpa kyh cha O satuhpazy ta ama pahno chai hra aw. Chyhsa to khotalaina kawhpa ta ama y thei n’awpa kyh chhao pheisaihzy nata police-zy ta ama pahno chai hra aw. Râh rah kha chhoh liata apahrapazy thlalôh kawpa ama charei thei n’awpa kyh cha ryhpa taotuhpazy ta ama pahno tyh.

Taopathituhpazy hro cha Krista pathipalôh hnei awpa byuh ta, ama taopathina chakaona rai cha Krista eih a cha tahpa pahnona chôta ama chakao awpa a châ. Krizyha ngiapâtuha cha Khazohpa hrialapazy châ pita, Khazohpa o asatuhpazy eima cha (1 Kawr. 3:9). Taopathituhpazy cha parao hawpazy paduatuhpa, chyhsazy siena lâpi paryhtuhpazy cha ama

cha. ABeipa ta taopathituhpa duahmo liata eima dua thei hra n'awpa ta a thlahpa tha maniah patlô chy mawh sy! Amen..

.....

KHAZIA NÔ-U BIE EIMA REI TLY

Eima raopaky lâpa Khazohpa chyhsazy ta ei 27 na, General Election Assembly (Aru) cha, ama hneina sôh nata thazy hlupi pahryuhpa ta ama vaw tobi haw. Eima ti nata tlâ ta aphulei daimana taihta a rôhna. Aru Assembly ziza cha, moto palô lia y thlahâ ta palôhliena chôta eima vâ ngasa sai. Hiakha lâ tawhta Khazohpa ta ano pôhpa Awnanopa he pathlua leipa ta aparôhnasa lymapa eima hmô tita eima thlah a lô hmeiseih. Khizaw suto he thatihpha chhona maihta he chanô hmotaophapa he ama chho lyma thlyu aw. (Mt. 26:13) atahpa hawhta, Aru liata, Khazohpa chyhsazy taophana he Awnanopa a y lyma chhôn cha my thei rimapa cha aw vei.

General Election liata atly patloh penawhzy cha Khazohpa sathaw athupazy tlaita a py pita, atloh khao ma leipazy cha pahnetuhpa ama tloh hmeisei. MCC General Secretary nata a viasazy hnohta Aru Assembly liata nama palôh cha hria ngasapa hmozy maniah chho ula tahpa hiahri pita maniah ama chhyna cha Atlypatlopa nata atloleipazy ama hmiaphao anano tlaleipa ta, alyna nata akhokheina hmiaphao pha ngasapa ta ama ypa cha no-ah eima ta hmeiseih. Pahnetuhpa nama tloh hmeiseina tahpa ta ABeipa ama palyupalih. Local Church liata Hyutuhpa nata Department chhituhpazy atlyna ta thlai pazao lyma ta, buana y leipa ta pahnetuhpa duahmo liata ama yna thatihzy vaw thei pita, Khazohpa liata eima lyna mothlih dei a loh. He râh liata a ypa Khazohpa chyhsa panyu khao vei. Eima ly tua chai awpa cha awnanopa luh eima Beichaipa Zisu Krista a châ.

He ta tluta ABeipa mania ataopha tarawpa ta thi nata thaw apahlaopa ta nohto raihria pasa pita eima riethei sipasatuna vâta eima pahrana ti nata tlah chô ta no-u reih pita, râh chheihpâ nata râh chawh karaipa eima tahpa ha tyh; Maniah hropa ti nata tlâhzy cha keimo eih hlata apha viapa hawhta angia pita eima uava tla maw tyh. He he ti nata tlah taotuhpa Khazohpa liata eima hmo paraona lai kawpa a cha tahpa pahno ei su u. Hrokeitlâh, Tihrotlâh, Patheitlâh chyhu tlâh, Kahreitlâh, Sawhmotlâh, Hraithlaotlâh nata Thatlo tlâh nata achhôn liata chavâh zydua he Khazohpa ku zothaipa ta taota, hmohrohneipa nata ryusopa hlupi ta apabie. Keimo he he râh liata pahra awpa ta maniah a kho khei. He hawta tovyuh vahnei vâta Beipa liata y ei su u. He râh liata Krista pôhpa Awnanopa akaw laisei lymana chhao kô 100 a hnia haw ba. Mo thokhazy eima ti nata tlâhzy lia no u a reipa eima ypa hawta, eima Awnanopa chhao he alaiseih thai khai lei awpa hawhta pachapata no u eima rei hra ty. Atanoh taihta chaka vawpa chu ta, apahro, apalaiseisapa he Khazohpa cha vei ma? Khazohpa a no tlai he eima chha a cha vei mawsala (Hlazy 124) he Awnano heta thlo tase Awnanopa pythropazy uava pata tlyma, hmasina tahpa reika ta tlyma, bie nata hla thiepa phipa ta Awnanopa chakaona rie eima patheisa tyh aw ma? He he ta kô (100) daima chhônhta maniah chhitha tuhpa eima hrana daihti lia chhaota mania ahru khei leipa Krista chôta moleina lai kawpa eima parao nga kaw tahpa pahno ei su u. Keimo chata Krista he ei tho, ei pali maniah am thi ka hei awma?

Eima râh rietheina, sipasanazy vâta paphoh khao kha ei su u. Khazohpa ta khacha maniah pahno ta, mania hmothla ha tyh tlôh ta, maniah apacha kaw tyhpa vâta thlahlopa ta y ei su u. Paha lei, chatlie lei phahla lei, pahryu leipa ta, Khazohpa ano tlai ta he Awnanopa nata achyhsazy chhitha lyima mawh sy! Amen.

.....

EI LY KAW SAI EI'NA

Vabie Ngôchhau Paw

Krizyha Tlâh Awna liata ei khitlyna thatih ro awpa ta hruapa ei châ nota a ly kaw taraw na ta, kâchhiena dei thata ei vaw hnei. Ei lôh-mao thyudyu daihti ta nôpawzy achhaih thei leina vâta kô1977 tawhta siku kia ei vaw bâsai haw. Cha daihti liana cha ei nôpawzy likah liata lyuhmah ei vaw duah tyh(lyu ei vaw thlyu tyh). Cha hawhta lyuthlyu pâna chôta ei paw ta bie sôhpa hluhpi eina chho hmâ hawpa ta ei pahno. Ei nôpawzy hnohta ypa ei pahâsa lichih, 1979 August 29 noh ta ei kyhpachâ nôpawzy cha eikhapi ta khizaw miah ama vaw khôsai haw! Cha daihti liata eima Awnano liata nôpaw chaipa Rev. K. Teitu ta Raritlâh Local Church lâ thlah palôhna châ miah za paphao ta, eimâ ly hmeiseih.

Cha rakha tawhta cha, khih liata ei ngia nâ ryh thai khao leipa ta, sievaw chakhyhpa nata raihlaio laiha duahmo liata ei vaw y haw. Sabyhpi liata o eima sa nota Saya Sivâpaw ta, "Atahmâ he siku kiah heih la, hawh tu aw va chi," tahpa ta eina chho. Eima râh sawhkhâ ryureina chhie kawpa hryta ei paw VCP pension nata ei uhta VC Clerk zy zawzipa ta 'Pheisaih Kaoli' vaw phao hraoh бapaб. Ei vaw satlia tawhta ei paw chyhpa Hremâ mahpaw ta lahpi hia awpa ta eina chho hâ bâ. Hrochhôn âkaolâh awpa ta Lialaipi liata eima puhpa sawchanô Laihsa Pawmai ei kaw hiah. Ano ta, "Siku ei kia khoh ha chy," eina tah hapa vâta kei chhao pachâ bualuah na ta, "Aw, dyhchâkhôphie kiapa ta olyu eima vaw padua tita pheisaih kaoli ei phao bâ dâhdei aw hezaw!" tah na ta, siku kiana lâ ei vaw thao pakhua haw.

1983 June tawhta siku kia awpa ta Patheitlâh lâ ei sie. Patheitlâh liata saiso a thai kawpa Pu Zaivawra ta, 'Sikul upa' tahpa moh na bie ta, ei khotlâhkhei kaw. Siku lâ cha kdy na ta, eima pachutuhpazy cha: Saya Rakhai nata Saya Duawma, Salyutlana liata châ ei chulâhpa Saya Thavaw, Patheitlâh liata siku ei kialâhpa Saya LB. Siama nata Saya Chhatia zy vaw châ chho ei ta, ei ly via pachai heih. " Rev. Dr. LB. Siama uhta, Macha Pâchhôn (late) kha, py charu ei chulâhpa châ ta; Rev. A. Rakhai uhta, Macha Ramâ chhao py palih ei ezâlâhpa a châ. Siku ei vaw kia heih tita châ ei chulâhpazy hryta pakha cha Evangelist Niechha(Beiseihpaw) a châ." Patheitlâh liata kô (2) chhôn tlai opati ta siku nâ pakiasatuhpa ei parâhpa, Puhpa Ngechhâpaw chhônkhâ chôn liata ei lyna lo beih aw vei.

Khazohpa chhitha phana zawzi ta May 7, 1987 noh, chhônkhâ vaw padua pi ta, June thla thaona liata pyhrawh result vaw pua ta, eimâ lyna a vaw ki via heih. April 6, 1988 noh ta Khazohpa tawhta sawchapaw byhnâ vaw to pi ta, eima mahpaw chyhpa Rev. DK. Hiechai ta MEC Treasurer a chakao haina daihti a châ vâta a moh, 'Vabie Ngôchhau' tahpa ta a vaw bie.

Eima khih, Raritlâh liata PAT chakaona chôn UDE ei vaw pazao hualua. Kô palih chhôn EM Office, Sittwe liata achhai-any tyh pi ta, Mission Field Director, Rev. Joseph Mara Zalei ta thathyuna biezy miah chho ta eima tha miah a papawh tyh. Zâlâ daihti liata buakhata

bie miah a reilâh khai tawhta, “Khaw, nama zydua châ reih khai bâ the u,” tah ta o chôlâ miah a kiasai heih tyh. Kô palih chhôn niedo miah a pie tyhpa Enista nô nata Ebeneza nô zy miah ama daorai tyhnazy kha my thei 7apa7. Cha nota kô palih chhôn UDE ei kialâhpa cha Saya Saihmô (Rev. Sa E Hmô) a châ.

1995 kô B.A ei vaw patlô tawhta daihti rei leipa liata MEC Office tawhta ama awpa, IDP liata chakaona raihria awpa ta Saya Mahmô (JAT), Saya Lai Ô (JAT), Satlia Zaphetha nata keima chhao rai eima vaw hia khoh. Rev. Fc. Nôkha (Deputy Moderator), Rev. M. Vahnei (SES) nata Rev. Victor Ve U (ES/Edu) zy ta interview miah tao ei ta, raihria ahnei mâh leipa Satlia Zaphetha patlohpa a châ. Cha zâ cha Rev. Thatu (Saya Zaphetha paw) o liata zâpati hmaohkhata ta dôkhoh pi ta, eimâ vaw ly kaw heih.

Chatawhcha Lialaipei liata ei puhpa Pawmai paw ta, “Lialaipei liata raihria na hmô khao lei tawhta cha, hawtinawh nata ama nô kha Lialaipei lâ kaw chhihtha ula, nâma cha achuna pazao via chy mah y,” eina tah syulyu haw. Eima mahpaw bie chata na pahnie kaw ta, hawtinawh nata ama nô cha eima khih, Râritlâh liata siesaipa ta Yangon lâ zâ thao phiehphâ na ta, December 2, 1995 my ta Saya Rawmâ o liata ei za tlô tua chai. Eima râh buana vâta siku kiapazao thai khao lei, khih lâ kua awpa ta ei raihria pazao heih nawpa ru kaw bâ, a tahna daihti liata bie hiahrina ei parusa chaipa cha, “*Khaitaih lâ na vaw aw?*” tahpa he a châ. Oluhpa pakha tlaita lahpi-saw siesaipa ta ei y chakhyh thlâh hapa cha eima biatuhpa Rev. C. Thaulei na mo thei leipa ta khih lâ sie awpa ta eina chho tyh. Yangon liata ei y chhôn nâ deichhytuhpa ei paw Teithâpaw chhônkhâ, Professor Dr. Mi Mi Kyi chhônkhâ nata MEC, Yangon Office liata Computer Operator nâ pahriasatuhpa Rev. Dr. LB. Siana zy chô liata ei ly hmeiseih ei.

He daihti liana he ei viasa pha kawpa K. Hra U ta Yangon khihpi thatih zy, Public Services Selection and Training Board tawhta Officer raihria thlai hmô theina thâtih zy na chho tyh ta, keima chhao cha liana cha ei vaw patlâh tyh hra. Department sâsari liata a vaw patlâh taraw na ta, ei thoh deita Written Test (Châ ta ropa ta ezâhna) ei vaw tloh thei.

Atahmâ ei raihria haipa Survey Department châta Written Test ei tlohpa thatih ei thei nahta eima biatuhpa Rev. C. Thaulei chho awpa ta MCC Office lâ ei zu. Rev. C. Thaulei za y leipa ta, Room sâkha liata amâ tyulâhpa Rev. T. Pahrang, Mission Secretary dei a za y. Ano hnohta ei thatih cha chho na ta, thlah a chhâna daihti liata einâ thei awpa ta ei haw hra. Cha hawhta ei chho khai patanata, Mission Field raihria vâta a vypa chyhsa pano hnohta, “Buakhata a vaw chalih chy muh vy, he sayapa châta thlah ei vaw chhâ tua aw,” tah ta, “Hy, Abeipa Khazohpa y, Phirao hmia liata Mawsi hmâh chi ta, Nebukaneza hmia liata Dania na hmâpa hawhta, he na sawchapawpa he Myanmar sawhkha hmia liata hmâh hra mah y,” tahpa ta thlah thlai na chhâ pa haw. Ano he Nay Pyi Taw liata Lai Baptist Church (CBCN) a paduatuhpa a châ.

Survey Department raihria via chaipa cha khitly awpa a châ vâta Written Test liata tloh ta, Oral Test (Bie ta hiahrina) angia awpa zydua, 10 miles taih, dawh 2 nata a khophie chhôn, phei ta sie thlyu awpa a châ. Chavâta zârâh tawhta Survey Office lâ miah awpakhy ei ta, a mylâ my ta Yangon khihpi khôtho lâ mawtaw ta miah siekhei ei sala, phei ta sie awpa a châ. Cha zâ, Survey Department Hall liata miah ama pariesa nota, “Hy Abeipa y, Zawsua hnohta na phei ta na tlyna râh cha ei cha pie aw, na tahpa hawhna khata atazâ ei riena su he, ei raihriana su châta na pie bei mah y,” tahpa ta thlah ei chhâ hra.

Survey Department tawhta ‘Stereoscope mo thaina nata Phei ta siepa zy’ miah ama pataosa khai tawhta Public Services Selection and Training Board lâ ‘Psycho Test nata Oral Test’ tao awpa ta paphaopa eima châ. Cha su liata tao byuhpazy eima tao khai tawhta cha a result vaw puapa deita eima mokhâh paru thlâh ha bâ. Nohkha cha, ei viasa kyhpachâ ngaitapa K. Hra U ta eima result ama tawpa cha hmô ta, cha tawhna chata keimo o lâ miah kaw charei 8apa ta, “*Ngôchhau paw, nâma cha Vawthau na châ bâ aw na,*” na tah ta, alykheina kuchachâh lâ eina hlâ. He hawhta na khokhei ta, nâ lykhei laituhpa K. Hra U hnohta chhao ei ly ngaita kaw.

He zydua he keima thaina vâta châ vei. Awnano nôpawzy thlahchhâna Abeipa Khazohpa ta a chyh-eipa a châ. Abeipa moh reithai rili’pa châ mawh sy! Amen.

.....

NA TYHPA HMOZY TAWHTA ACHU PHA MA Y

Pro.P. Vyupar
KNP Secretary, MEC Hqrs., Lailenpi

Chyhsapa hro liata chinanopa hmo hluhpi alynazy, thaphanazy, chiehleinazy, nopôna hawpazy eima tyh lai h tyh. Chahawta eima tyhpa tawhta hno lâta athie viapa ta tha eima patlôh khoh. Nôzy he kyhpachâna ta a biethla-hapa ama cha tah ei sila reih chhei aw ma pi. Nôzy hro liata a ypa saw kyhpachana he khapa ta hma thô thei awpa acha leipa hawta phusa ta chalei thei awpa chhao cha vei. Chhôhkha liata sawnazy mohôhna nata Awnanopa chakaona, khitlâh liata nô machâ paw machazy mohôhna nata chiehlei viapazy kyhpachana hnei ta palôh pasi kawpa ta tia hmana hro chhaota hro ahmâpa ama cha tah theipa a châ.

Mano Ivy liata biepiepa hawta thi daimapa ta saw sapa chata, saw cha avaw pi khai tawh chhaota moh kuh sai hnazy nata chhôhkha liata tyma buabanazy papeisa leipa ta kyhpachâna ta palôh pasina chôta ama vaw chakao lyma. Cha chôna chhao chata thokha chhôhkha pawhrâhpazy ta ama riethei taohna, buaba tymanazy cha vaw pahno kheh thai tu vei ei. Nôzy kyhpachâna he Zisu kyhpachana nata pakho panga awpa acha leipa chhaota kyhpachâna sahchaipa cha khiamaw tahpa he eina pachasa kaw tyh. Na hro liata vaw pacha pachhi tuah bei ma y. saw na sa hlâta palôhphao nata sa khai tawta palôhphao kha. Saw asa leipa chhao ta kheh hawpa hawti tlyma na vaw mohôh khasiapa hawti liata na palôhphao khaw. KHD liata Hawtizy o la ama vaw di nata nawh avaw hatuhpa nôzy palôh keichheipa ta ama mo ku thai khao lei, pati nie pahâh khao leipa ta ama vaw hmâ tyh. Keimo hmata cha tlupo ta eima sawna nata eima saw chhôh tawhta eima papua leipazy châta kyhpachâna eima hnei khiatacha (Lk. 12:17) lia eima hmôpa sabu sakha chhao pahlôh leipa ta areih khai pa khazohpa kyhpachâna chhochhi cha kha tluta a cha pacha awpa a pei mawh. Nô pakha hro liata hro ta atyh awpa achipa hlupi a y aw. Cha liata sakha acha hra awpa ta ei pacha pacha sawna zy ama zawh (lai h) hlâta chhazaw khinarah lata sie awpa(apahah) awpa he a cha aw ei vaw tah tyh. Tho khazy reina liata cha â ngiapâ leipa vâta thi (apaha) awpa a chi ama tah tyh. Cha vei, mohôh khasiah chy awpa maophaona lai kawpa acho ta apahniepazy vâta a châ aw ei tah hri.

Chakao awpa maophaona cha Khazohpa tawta achâ tahpa nô achâ tuhpa pakha ta apahno lyma awpa a byuh. Cha maophaona chhaota sawna zy mohoh khasia ta chakao awpa he a pei mawh. Nô zokhebe Mawsinô ta asaw chapawpa Mawsi Khazohpa ngiapâtuha saw Hebrai achana apahno awpa khokheina ta avaw chakaopa hawta Khazohpa saw chana apahno awpa ta sawzy chôta eima chakao awpa a châ. Cha hawhta nô pakha hro liata chi chai awpa sakha cha Khazohpa lâpi dopa liata chhitha thai thlamaw lei awpa he achâ. Chavata ngiapâna liata a ipa ta ypa ta saw nawzy chhitha thaina awpa ta sona eima hia awpa achâ (Zami 1: 5-6). Eima hia tyh hapa chhao khata hia via lyma awpa a châ. Nô pakha ta amaopahaona chakaona apahnopasia vei khiatacha, hro he hraoleipa acha aw, maophaona eima hneipa apahnopa ta cha liata palohru tlokhuh ta eima chakaona lia deita he hro alyhna y ta, eima hro chhao he mâ ahneipa a châ. Chavata hro mâ hnei awpa he khizaw liata eima hro chhâna achapa hawhta chhônkhâ liata eima chakaona he tiana papua via lyma awpa a châ. Cha cha Khazohpa ta khizaw liata buakha eima y chhôn ta maniah akhokheipa chhao acha hra. Chakaona cha ngiapâna liata hmo hlupi achuna nata thatlôna a châ. Pihnô Vakhai KHD liata nawha liata a vaw chakaopa ta, he hawhta arei.”KHD liata ei vaw chakao tawhta hlano ta ei chiehlei, tlâhleina zydua kha ei vaw tlâh khai haw a tah”.

Cha hawhta atahma hla Covid-19 chhôn he nôzy chhônkhâ chakaona liata pakopazi viana daiti hawhta ei hmô. Achhyna o zy pangai thai khao leina daihti liata eima ypa chhao ta chhônkhâ liata apakhynazy hnei tyhpa hawhta, ngiapâ riahphana nata ahropa hmo hlupi eima chu chyupa ei hnabeiseih. Cha liata keima ta achyhta ei vaw palâsa khotha cha chhônkhâ liata thatihpha rei pahâhna, thlahchha leipa ta y ngiaryh leina, hawtazy Hla solo sana, Bievaopa reina, actingsong lah pahâhna daihti pathao thlachhana hawhpazy liata tha ta ama kiahthypa ta eima pahno. Cha hawpa hro ta Khazohpa leipa ta y thai ma pi tahpa apalapasia kaw. Phi. 4:6 bie hawhta ato he Khazohpa hnohta thlachhana ta tlô kheh tyh awpa eima chana chhao maniah apahnopasia ngasa. He hriiah chhiepa chhônhta thokhazy pita ano lâta thlachhana dei leipa ta eima tao thei via hropa a y leina daihti liata hnatlana lâta hriatuhpa Dawtyzy nata hriatuhpa zydua ta ama chakaona liata thata ama tiahmapa ta eima pahno. Ama chakao tiamana chhao cha amopâ tlâ ama cha hmei seih.

Covid- 19 thatihzy tawhta ei palôh na vaw pahnie kawpa line tawhta ei vaw rei hrapa sakha cha USA liata pawpipa pakha cha he hriiah chhiepa ta vaw pasa ha hra ta, apasa chhônhta huhsona cha vaw pangaiha chata, avaw tlâh ha nata Sizo chô bâ awpa daihti liata US Dawlar 5000/- ama vaw hiah. Cha daiti liata hmiaphao chhipa ta amohthlih avawpa thla nga hai. Dawty ta Dawlar 5000/- hnei va chi ma? tahpa ta vaw hiahri ta, ano ta avaw chhyapa cha phaosa ei hnei leipa vâta châ vei. Ei tlâh vei chhônhta buakha huhsona ei pangaipa hmâta he zie phusa pie abyuh khiah, ei vaw pih no tawhta atanoh taita asaipa ta husona na pietuhpa Khazohpa chôta leibâh hluphi ei hneipa vâta ei ngiachhiepa a cha a vaw tah. Cha hawhta eima hmo tyhpa raihruna nata alyna hlupizy tawhta hmo achu awpa hluphi avaw y tyh.

Keimo ngiapâtuhpazy a ei viapa ta nô nawhzy pita he Covid-19 chhota chhônkhâ chakaona liata eima tiahmanazy he eima pazao lyma awpa ta eima khokheh kawpa a châ. Atakô he KNP aduah noh chhao eima o chhôn chyua liata ahmâna hneipa vaw chata, ngiachhie eima tah kawpa chhaota kaokha lâta cha eima vaw hmâpha kawpa pahno pita eima ly ngai ta kaw. KNP Bie tlapipazy hmâpa ta vaw hmâ khaipa châta, Local KNP luhpazy ta o to angiapa ta aduah noh sohzy cha pakhyua vaw hneipa achâpa hawhta Local thokha liata aduah noh sôh

he kô hro hlata chhao ama thyu pha viapa ta eima pahno. KNP luhpazy ta o to kia ta byhna awpa na chôta ama pakhy. chhôhto hnohta awna daihti phapa eima hneipa chhao he chakaotuhpazy châta chakao thatlôna sakha a cha cheingei aw tahpa ta eima hnabeiseih. KNP a vaw duah pathao tawhta atahma taihta KNP aduah noh o chhoh eima chhohkha chy liata eima hmâna he a eikhana tla a cha awpa ta eipangiasa. He he chhohkha chakaona liata pazipako via lyma awpa he Khazohpa ta maniah akhokheipa vâta a cha thei thlyu aw. Chavâta nôzy pita chhohkha liata eima chakaona, local liata chiehleipazy eima chakaona, khitla nô machâ, paw machâzy chô liata eima chakaona hawpazy liata kyhpachâna eima hneipa kha pa-iasa via rili ta, tiama papua via lymana chôta eima chakaona patlo achhuah chy suh vy.

.....

NGÂCHHIHPA THYUTLIA

Pro.P. San Lwin

KTP Secretary, MEC Hqrs., Sabawngpi

Biehmia

Atakô 2020, KTP lâta ahmâna bietlâhpi “Ngâchhihpa Thyutlia (Daniel 1:17)” tahpa he eima râh thyutliazy hrozie padona liata pahaona lai kawpa nata Marapa râh ta ângiah chaipa hmo sâkha a châ. Izarei râh cha abei Sawlawma daihti liata râh no lâta a vaw pachhaih ta, Maw lâta a ypa cha Izarei râh châ ta, chho lâta a ypa cha Zudah râh tahpa a châ. Babylaw sawkhâ he Nebukaneza abei a vaw châna daihti liata a thatlô kawta, khizaw râh zydua taihta ama chipa a vaw châ. He daihti liata Zudah râh cha Babylaw sawkhâ ta vaw pahnie haw ta, Zudah râh liata thyutlia athaiso viapazy cha a râh lâta â vaw chhih khai haw. Chazy hry liata Daniel nata aviasazy chhao ahlaopa a châ. Babylaw sawkhâ ta a râh chyhsa ama châ thei nawpa ta kao nano nano lâ tawhta tei lymâ taraw ta, Zudah thyutliazy deikua cha amâ ngiapâna nata ama hrozie phapa cha pahlei leipa ta hrona tlaô ama tlua hri. Arylâ liata Zudah thyutliazy Khazohpa amâ ngiapâna, Zudy phoryhpa ama zina nata hrozie nôchâ liata ngâ amâ chhihna thâtih eima chu awpa a châ.

Achhoh biezy

Daniel châbu he Babylaw sei châna liata aypa Zuzy lâta paphaopa châ ta, châbu ta âchhuah chaipa cha sei châna liata aypa Zu chyhsazy ngâ amâ chhihna palâsana a châ. Babylaw râh he Zudâh râh nochhilâ ta a ypa châta, Maduk khazohpa (Nebukaneza nothlahpa) a chhupa ama châ. 605 B.C rahchhoh liata Nebukaneza cha Babylaw beipa vaw châ ta, Babylaw sawkhâ he athatlô ngaita kaw ta khizaw zydua taihta ama chipa a vaw châ. Zudah beipa Zehôiki ryureina kô thôhna liata Babylaw ta Zerusale khihpi cha vaw pahnie haw ta, a chhyna o liata Khazohpa o hmobaoh thokhazy nata Izareil sawzy hry liata satlia sein a hnei leipa, hmipha ngaitapa, pahnona lâta novâhpazy cha ama râh lâ amâ chhi khai haw. Chazy hry liata Daniel nata aviasa pathôhpazy chhao cha a hlao hraba a vaw châ.

Babylaw beipa Nebukaneza chata Zudah râh lâ tawhta ama vaw chhihpa Zudah thyutliazy cha Babylaw chyhsa ama châ thei nawpa ta ama mohzy a vaw pathlai chy ei. Ama mohzy nata yzie zy cha arylâ hawhta a vaw châ. Daniel yzie cha “Khazohpa cha ryu

miah reituhpa a châ” tahpa tawhta Beltesaza “Baal khazaohpa ta ano hrona pabohsa,” hananiah yzie cha “Khazohpa ta angiachhiena apahmôsa” tahpa tawhta Shadraka “ Aku khazohpa bieheina ry liata,” Mishael yzie cha “Khazohpa hrawhta ahy ma y” tahpa tawhta Mesaka “Aku hawhta ahy ma y,” Azariah yzie cha “ABeipa ta abao” tahpa tawhta Abei-nekô “Nekô sei” tahpazy a vaw châ. He hawhta ama mohzy pathlaina he Babylaw beipa ta zyhna kyh liata ngâchhihpa Zudah thyutlia papalihzy Khazohpa amâ chhyna tawhta Babylaw khazohpa lâ pathlai/pahie awpa âchhuahna a châ.

Daniel nata aviasazy cha Babylaw abei o liata ama chakao thei nawpa ta kô thôn chhôn abei pati pahâhpa nata kresawti ta pasa awpa ama vaw châ. Abei pati pahâh kawpa nata kresawtizey nie awpa cha Zuzy dâh nata ryhpa ta apakhâpa a châpa vâta nata amâ papuapalei awpa ama khoh leipa vâta nie lei awpa ta khâchâ amâ chhuah. Theihthaina 11 liata Izarei chyhsazy nie awpa nata nie lei awpa sazy palâsapa châ ta, Zudah thyutliazy chhao cha dâh nata ryhpa apakhâpa achâpa vâta nie lei awpa amâ chhuahna a châ. He hawhta ama pôhpa a papuapalei lei awpa ta amâ sohsina he ta hmodopa deita ataopa nata hmo âdo leipa rai atao khoh leipa ama châna âlâpasiana a châ. Zudah thyutliazy cha abei pati niepa hlâta âhnalasi nata ti pathaihpa tlaô a haw ei ta, hyutuhpa cha azibeipa riah a chipa vâta nata rihchâkhazy hlâzy ama chhie via tlamawh khiah tahpa a pachâpa vâta anôpo kaw. Châhrasala, amâ hnawna cha pasaipa vaw châ haw ta, âhnalasi nata ti pathaihpa niedona ta achu awpazy cha amâ chu pazao lymâ. Amâ chuna liata byhnâ hluhpi to ei ta, thaina, sona novâhnazy liata abôchhâ tlâhpa chyhsazt ama vaw cha khai haw. Aeihrâhpa ta Daniel cha athaina sona liata pahno via, novâh via lymâ ta, hmialâ hmo a vaw y awpazy taih alaichadai thainazy a vaw hnei haw.

Zudah thyutliazy cha Khazohpa ta a pasai leipa nata Zuzy dâh nata ryhpa ta a pakhâpazy parao awpa khoh vei ei. Khazohpa dâh nata ryhpa cha Khazohpa apahno leipa Babylaw chyhsazy hry liata ama y noh chhaota tlaô ama zi lymâ. Pawla ta “Chatanachata ei kho ngaitapazy saih u, bie namazy tyhpa hawhna khata, ei y nota dei hria leipa ta, atahmâ ei y vei chhôn heta tlaô hria viapata, chipa nata chalyupata nâmo pachhana châta hria teh u(Phi 2:12) “ Daniel nata aviasazy cha molei hlu viana su liata ama hrozie phapa tlaô palâsa via hri ei ta, Khazohpa a za leipa chyhsazy hry liata Khazohpa ama za via hra. Zudah thyutliazy hawhta hrozie phapa hnei awpa he thyutliazy châta pahaona lai kawpa nata atanoh eima râh ta ângiah chaipa chhaoa a châ. Daniel nata aviasazy cha âhnalasi nata ti pathaihpa ama niedôpa tlai cha abei pati pahâhpa aniepa satliazy alânazie hlata ama hmipha viana, ama thatlô viana, ama pôhraohzy pha viana nata achuna liata thai viana, novâh viana la avaw châ haw. He hawhta ama hmisa phanazy, ama thatlônazy, ama thaisonazy cha âhnalasi nata ti pathaihpa niedôna vâta châ leipa ta Khazohpa vâta tlaô a cha. Chavâta Khazohpa cha khâpa hmâh achâleipa hmo chyhta kha hmô rônah kawpa lâta a pachâsa theipa a châ.

Biekiahmiena

Daniel nata aviasazy cha Khazohpa apahno leipa Babylaw sawhkhâ bieheineazy liata chakaona rai ahriapa ama châ. Babylaw beipa Nebukaneza ta achhuahpa cha Zudah thyutliazy Babylaw châ pachuna ta ama pachânazy pathlai awpa, ama mohzy pananona ta ngâ amâ chhihna parao awpa nata niedo nanopazy piena ta ama hrozie nôchâ pathlai awpa he a

châ. He hawhta Khazohpa apahno/ aza leipa phoryhpazy hry ta Daniel nata aviasazy deikua cha Khazohpa kohodâh hawhta hro thaina lâpi ahmô lymâ. Âhnalâsi nata ti pathaihpâ ama niepa tlai cha byhnâ tô khei lymâ ei ta, abei o liata chakaotuhpa châta tlâh châpa ama vaw châ haw. Khazohpa cha Zudah thyutliazy châta byhnâ hnawh a châ. ABei Nebukaneza chata sona nata novâhna bie to hiahri ei ta, a khihnarâh tlokhu liata dyuthaipa nata awhsi kyh apahnopa zydua hlâna chata alie hrawh ta ama pha via tahpa a vaw pahno haw. “ABei pa china he novâhna a thaona a châ (Bisozy 1:7)” tahpa he Daniel naa aviasazy byhnâ tona kyh liata novâh âchhih kaw. Chavâta Khazohpa china ta achuna, raihriana nata hmo taona he nohlaona, hlaotlona nata byhnâ tona a châ tahpa eima râh thyutliazy ama pahno awpa he ei thlahchhâ chaina a châ.

.....

LAYMRO RÂH THÂTIHPHA GODEN JUBILEE

By. Rev. Khawthai +Rev. Victor Ve U

Marapa râh tawh
Lemro Chih râh lâ
Thâtihpâ khaihna bie
Chho awpa ta Matu râh
nata Dai râh
Ama sie pakho haw
 Thâtihpâ cha chho lai eita
 Lemrochin râh ama tlo haw
 Zona lia chareipazy hnohta
 Thâtihpâ cha chho ei.

1978 râhchhoh liata Machâ Vakho (Jubilee Press Manager, MIEC, Hqrs Sabyhpi ta hla ahipa thâtihpâ chi eima hina râh cha. April 3, 2020 liata |Chetaw khih thâtihpâ angiatua chaina khih lia ta aly ngasapa ta taopa a châ.

Khihchhai 700 tlô eita Jubilee Pakhyi chata ama vaw pie pasaipa seih nata vao he nie pachhâ thei khao leikha eita, vao (7) nata sei (3) he a lai bâhpa yna taihta byhnâ eima to tahpa thâtih miah a ma chho. Jubilee kyhchhi liata tlâ ama aw khei chaipa biephuapa nata ama hlanazy cha Lemro rei ta he hawhta aw chaimai eita, Lemro chavapi nata tla zydua ama chahrysa lyma.

Zubilee tla awna

1. Wai nak za pek ki Hngannu ----- (Tak nak ve she)3
2. Zisu Krisita ahlih yng phung lawng pe sipi akut yng ka ---- (Kei lyar pyang ki he)3
3. Phung lawng pe Immanuel pe ah----- (Thawn Pyang ki)3

Zubilee bie phuapa

1. Athang kdaw hi ----- (Kei hyng nak)3
2. Athang kdaw hi ----- (Kei hyng nak)3
3. Athang kdaw hi ----- (Kei hyng nak)3

Jubilee liata zawpi zydua ta reirao kawpa ta aryla liata hmopha leipazy pahlei khai awpa ta zawpi ta, pakhu pahneipa ta Khazohpa lia bie taihna ama hnei.

1. Manô mapaw tawhta ryuhi hawhta a ypa dyuchei nata kali rahpa zydau angiathai khaipa a châ ba aw.

2. Takâ tlyma, sâh tlyma apôhna lapa ta dyu pacheisapa he tao khao lei awpa a cha aw.

Ama Jubilee kyhchhih liata khatlu ta ma ama lyh takhiah cha, Jubilee athei thlana chabu. Papua eita, he chabu he, he hawhta ama chalei.

- | | | |
|----------------------------|------------|-----------------------------------|
| 1. Rev. Kasanbawi chhôhkha | Ks. 100000 | (Rs. 5000) |
| 2. Pupa Teiso Chhôhkha | Ks. 100000 | (Rs. 5000) |
| 3. Pupa Thanglun | Ks. 20000 | (Rs. 1000) chyu saita ama chalei. |

Ama lyna aki via chaina cha, Rev. Thlachhau, Lemro Missionary hmiatua chaipa ta Biehrail thiepa ataopa kha, Jubilee liata release chai ma eita hawti, Macha, alai achy mothlih chhaota ama la kheh chaima eita ama ly hmeiseih. Ei palôh liata Vailimapaw cha Golden Jubilee liata Holy Bible miah ataopa haw taraw bao naita ei ta nga.

Laymo râh la liata Missionary eima vaw tua penawhzy cha, Rev. Thlachhau 1970, Rev. Zaro 1976, Rev. Chhatia 1977, Rev. Hmolai 1976, Rev. Chhote 1980, Rev. Sauko 1982, Rev. Khaisu 1985zy nata Sikul pachutuhpazy chata Rev. Sitlo nata Rev. Sakao 1986 Sayama Pawzauzy cha eita 1988 liata Sayama Sihni nata Sayama Khinwesai chhao tuapa a châ. Ahnoh chaita, Rev. Pai-u 2004 liata tuapa a châ. Eima Missionaryzy cha Pension khai haw eita Rev. Zaro nata Rev. Hmolai cha ama chakao ngahaina daihti lia miah ama paha sai haw. Rev. Thlachhau, Rev. Sauko nata Saya Pawzau zy cha eima râh la kaw kua khao leita, Lemoro râh lia luh apabupa ta ama ha thlaha chy.

Jubilee pakhyipi ama taona khih he Kri a vawzy tua chaipa Pupa Kalong yna khih châta, Hmiatua chaipa Awnanopa Local Church a vaw duana a châ. 1975 liata Achhyna O chhao ama vaw pahy haw hra.

Lemro Awnanopa he 1985 kô tawhta amo râh chhôn ryureina eih hrapazy hnei thei eita 1995 liata Silver Jubilee tao eita 2006 liata KTP chhao padua eita 2010 liata KNP Py chhao a vaw dua thei hawpa a châ . 1985 liata Laymo reihta hlabuzy hnei eita 2020 liata Biehrail thiepa chhao ama vaw hnei thei haw.

Pastor hriatuhpazy achuna kyh la chhao hmasie kaw eita Yangon Insein Biehrail sikul tawhta M.Div (3) patlô eita tahma Insein liata M.Th chhao pakha pachusa ngapa a cha. Lemro thâtihpha Golden Jubilee kyhchhi he Covid 19 vâta keima MEC nata ECM la tawhta pakha chhao ahlaoh thei leipa ta y pita, chahrasala ama kyhchhi cha Khazohpa byhna ta ngasa eita eima ly ngasa tahpa miah ama chho.

(Note. He thâtih he akichai leipa hluhpi a y thei aw Telephone tawhtazy, Face book tawhtzy ta thâtih ei la pakhyipa chata keima pahnona chhao ei vaw baichhipa a châ.)

.....

CHICHEINA TAWHTA HMASIENA LÂ ARAPASUA SU

(Mch. Tai Au, SDD Secretary, MEC Hqrs., Lailenpi)

Marapa Awnanopazy hmasie via thei nawpa ta MEC ta Department he anano nano ta vaw paduapa ta, cha liata SDD (Service & Development Department) chhao he a vaw hlao hraba a châ.

SD Department ta a rapasua chaipa cha apasie laipa ta lyu taona tawhta sukha liata niedo thua thaina he a rapasua chaipa a vaw châ. He chhao a daihleipa ta Marapa eima zydua ta niedo ativyina châta chi eima cheipa he Chemical a hlaoleipa Organic achâpa niedozy papua thei awpa chhao a vaw châ hra. Atahma chhâ khizaw ta pasâhsa chaipa cha Organic a châpa niedo he a pasâhsa chaipa a vaw châ. Marapa chhao he khizaw hma a sie haipa liata asie ngâpa eima châpa vâta keimo chhao tlai hma eima sie via thei n'awpa he eima rapasua awpa a châ. MEC – SD Department chhaota Marapa zydua he sukha liata chicheina eima tao/hmâ thei khai awpa he hma ala lymapa hawhta Lialaipi liata TPA tawhta Training Centre chhao paduapa a vaw cha, Training zy ama aw tita nama vaw tlô pha awpa he a peimawh kawpa a châ. Hmotao eima chhuahpa he athabypa asie-vawna taona dâh eima pahno leipa ta taopa he cha kô hluhpi châta pitloh thei vei. Chichei khasiana nata palaiseisana dâh tahpa ta apho phota achupa a châ.

MEC SDD Department ta Marapa ativyina châta chichei awpa ta arapasua chaipa cha Coffee, Chedy, Makadeimia, Thawpâ, Wana, Sawphyu zy a vaw châ, eima râh alei su nata khichâh nahta a hmiepa he chei awpa ta patôpatiahpa a châ. Marapa châta thâtih a lychhih kawpa eima theipa cha, Japan nawh tawhta TPA Training Centre (Lialaipi) liata Coffee phaoh taona khaw (Machine) so awpa ta pachhuapanoh haipa thâtih a châ. Coffee daw he eima lo hluhpa a châ khiah cha khaw a vaw so bâ awpa ama châpa vâta eima zydua ta Coffee chicheina he tiama chyu su vy. A soh viapazy ta Coffee he khizaw chyhsa zydua ta niedopa a châpa vâna he ta zuana (ခေ့းကွဲး) a pha lyma awpa tah ama rei. Mara râh liata sukha liata chicheina eima hnei lyma thei nawpa ta Zone he sâ (5) ta pachhaipa a vaw cha. Zone (1) he Patheitlâh, Zone (2) Chakhai, Zone (3) Lialaipi, Zone (4) Sabyh, Zone (5) Ngephepi tahpa ta pachhahpa châ ta Zone chyuta Chairman paduapa a châ. MEC ta ahmâ haipa Synod hawhta pachhahpa a châ. Chicheina lâchhâ ta pahno khoh viapazy a y khiah cha nama Zone chairman nahta asaohia theipa châ ta a zaonazy vaw tao chyu teh u.

June/ 2020 thla chhôn liata MEC liata hriatuhpa MEC Office, TPA, COME zy hmaokha ta Coffee lopa châ ta MEC Office Compound liata daw 400, TPA liata daw 300, COME School liata daw 300 lo theipa a châ. Asu yna chhôn eima lô via lyma aw. Atanoh taihta Mara râh liata Coffee daw 100000 rachhôn alo bâ awpa hnabeiseihpa a châ. Eima zydua ta eima chhônkhâ ativyina châta nata Marapa hmasie via nawpa ta chicheina he tiama papua chyu su vy.

.....

ZISU KRISTA CHAKAONA RÔNAHPA

Rev. K. Teitu (1926-2005)

Biehmiapa

Eima Awnanopa hry liata he hawpa chakaotuh rôhnapa nôpaw, athatih achu tlâh awpa chakaotuh ngâchhihpa eima hneipa he apalaikheitlâhpa a vaw châ hmeiseih. Aw.. “Eima chakaona vâta mia thei aw” tahpa hla hawht tlaita tahma taihta athâtihe rei awpa ta zy achu awpa ta zy nata ama ku ropa châzy hmo thei rei thei awpa ta ama zo reizy thei pachhih lymâ awpa ta hmo theipa a vaw cha hi zaw tahpa ei vaw pachâ tyh. He châbu he aina hneileipa ta reikhoh chhih hmeiseih ta eima râh Krizyhna khihna râh a vaw kaw laihnazy nata hmiatuh awnanopazy ngâchhihna nata tiama kawpa ta ama hriapasanzzy maniah apahmosa hmeisei. Tahma chhathieh sawzy pi heta hmiatua nôpawzy pheihni eima pazi lyma haina daihti liata thlalâ hawhta amopâ awpa ta maniah pahao kawpa châbu a châ. Thâtihpha nata râh kyhpachâ vâta ama hneina zydua, thaisona zydua chhao nata sie vawna arai aru thla bo nata papeisanazy, ngiahlanazy rai y leipa ta tlokhuh ta ama chakaona thâtihzy he mothlih chita rei awpa tlai a vaw cha.

Ama pohpazy hmô awpa y khao vei hra sala ama mo deikua la cha chhâ khatlu ta hmata anano lyma hrasa Mara awnanopa a y chhoh zydua lei thai khao aw vei, lei thei khao aw vei ama chakaona vâta. He châbu he reih awpa history aphapasai dei cha leipa ta keimo chhao chakaotuh pakha duahmoh tawhta achu awpa chakaotuhpa hrozi awpa hluhpi eina pie hmeiseih.

Rev. K. Teitu thâtih chyupa

October 15, 1926 noh liata paw Bietei nata nô Thlieny zy tawhta vaw pihpa ta unawh hry liata chapaw seihnaipa a châ. Kô thoh apha haina daihti liata thlah âpalôhna chaipa apaw cha a vaw paha sai haw ta, hârahpa duahmo liata a vaw laiseihpa a vaw châ. A nohto hrona liata reingiana nata tiamana ahneipa a châ hleikho ta riaphapa chhao a châ. Siana nata hmo dopa tlaichhai ta bie hmeiseipa liata riahphapa ta alaiseipa a cha tahpa athâtihe eima chuna liata eimapahno thei.

Achu laina daihti liata a saya penawhzy ta chyhsa siapa, ngachhihna ta atiamapa âchâna zy vâta kyhpachâ kaw eita ama kuphei hawh tlaita ama za hmâ laipa hmô theipa a châ. Siku hawtzy hry liata chhao kyh toti liata uthei viapa ta za y lymapa a châ. He zydua eima hmô tita a hrozi hmeiseihpa hmô theipa a châ. Khazohpa ta chyhsa âhmâ laihpazy thâtihe eima vaw chu tita a chhuahna sianopa ahneipa nata chyhsapa nata hmohrotaopa zydua châta hmophapa a pachâtuhpazy nata ataotuhpazy ta ama cha lyma.

He daihti liata Krizyh nawpa duahmo he abeizy bieheina daihti achapa vâta rairu hmeiseipa a cha, chahrasala toti he pachapasiasa ta hmotao ta, ataopa chô liata ngâchhihpa ta âduah tahpa a Krizyhna lapi liata hmôpa a châ. Krizyhpa pakha nata pastor pakha duahmo a châ nawpa liata pakhana hluhpi nata taolana hluhpi siepahliepa ta Khazohpa nata akhihnarâh châta kyhpachâna rai ama hria lylia.

Krista vâta ahrupa hawhta ypa ta, Marapa ti nata tlâh liata **ZISU CHA ABEI CHAIPA A CHA** tah thei awpa he ama hrona achâpa vâta reipachhienazy, taolana, rairunazy nata chhônkhâ rairunazy papeisa v'ei, Khazohpa awna ao siapa ama theipa vâta a châ. Ama hrona zydua cha amô vyuhpa ta athihtuhpa Zisu Krista châta rietheitaonazy tlaao atly eita, pasipasawhnazy apeî tah leipa ta khizaw lia moh pha n'awpazy, hneirôhna zydua kyh nata raopa ta Marapa châta riethei pasatao awpa lapi tlaao ama tly.

Awnano liata ahria papua napa chakaonazy

- # General Secretary raih 1956-1987 (kô 31 chhôn)
- # President rai 1987 – 1991 (kô 4 chhôn)
- # Pastor rai 1991- 1992 (kô 1 chhôn)
- # MEC Assembly consultant 1992 – 2005 (kô 13 chhôn)

Kô 49 chhôn athina taihta ngachhîh kawpa ta MEC Awnanopa a vaw zeih kheipa a châ. ahro chhônhta achakaona liata nata apalôphaozy hluhpi hmo theipa nata achu thei awpa hlupi ta maniah a pie haw. A no bieso nata palôhphaozy hry liata “ Chyhsa modypa ta y awpa, chyhsa to palôh pachhie lei awpa nata uavana hnei lei awpa”zy he my lei awpa ta Mara bieso hawhta a châ.

A chakaona liata khatinorai seih palôh aphaoh lyma, Mara awnanopa he a hara lei n'awpa ta Awnanopa phu/py hropazy (MCC – 1985) nata azaona lapizy tluapa ta atao lyma. Mara tahpa he khatihnorai ta zakhei leipa ta apalaikhei kawpa ta â chahkhei lyma. He hawhpa eima awnanopa nôpawzy tahma taihta maniah hrolah ei sala eima râh awnanopa he khatlutama eima sapa nata thlapa ahmah a sie aw tahpa eina pachâsa hmeiseih. Mawtaw bikezy y leipa ta lapi phapa hmata y leipa ta ama hmozy aphaopa lymana chôta râhzy chahlô tyh eita awnanopa thlah amâ palôh hmeisei. Mokuh rietheinazy papeisa leipa ta bie nata hlazy moku saipa ta ama pachu lyma, awnaopa thla ama palôh hmeiseih, awnanopa khatluta ma aly aw va ma? Hlaozy thlata tota ama thao hra aw va ma? Hlazy moh pha n'awpazy vâta cha thlyu aw vei ei ta. Tanoh keimo zaw awnanopa thla eima palôh thei ma? maniah ama ngiabâh aw va ma tahpazy ei vaw pachâ tyh. Mara râh akei awpa, palôhphaozy ânano awpa he pasai tia rah leipa ta pôhkha hmaokha chhie khoh, pha kho awpa he ama tlaichhai chaipa chhao a châ. Chavâta bie rei hmotao ama sosi hmeiseih, awnanopa ao asiapa ta ama nathlie hmeiseih.

Bie pachhana

Ama hriapasanazy vâta a vaw pitlôh laih hawpa tahma Mara Awnanopa duahmozy maniah vaw hmô thai ei sala khatluta ma ama hro a ki aw va ma tahpa chhao he ama thâti rohpa châbu tawhta ei naw pahmosa hmeiseih. Eima râh chhôn lia sai dei cha khao leipa ta Oversea taihta Mara Awnanopa ta eima yna su maihta achhyna o padua lymapa ta chakaona rai eima hria pazao lyma. He châbu review tao awpa ta ei hluhpi ta vaw rei nata kao hluhpi tawhta pahnopasianazy nata pachânazy eina pahmosa lyma Ama padua haw chiepa awnanopazy hnohta khasia, mohôn thei lei awpa ei châpa chhaota he hawhta nôpawzy tao hria pasanazy ei vaw hmô tita keima chhao khâpa e ei tao thei hraw aw tah pa ta pahaona nata thatlôna zy eina pie hmeiseih.

Kyhpachâna hmo atao theizie ei vaw hmô pasia, seih palôhphao lei awpa ta aziepa palôhphaopa ta eima theina rakha chyuta chakaona rai tovyuh eima hnei chy. Eima nôpawzy kuhria nata achhuhna zydua he eima hria pazao lymapa a châ. Eima parao awpa chhao cha leipa ta keimo pôhkha atho n'awpa châta chhao eima hma lei awpa nata Marapa tahpa he a pôhkhana atlaichhaipa mo pho eima châ lyma thei n'awpa ta he hawh tlaita palôhphao ta vaw hria pazao mu vy tahpa ama hrota miah ama pahmôsapa a châ.

.....

Ei (49)na MEC Assembly liata Ngiâtlâhpa Biepathlupazy

Rev. Dr. L. B. Siana

(General Secretary)

MEC ta Awnanopa chhithana liata a hmâ chaipa Dâh miano a hnei. Miakhana cha “Khazohpa Biehrai Pathaihpa” châ ta, mianona cha “Assembly ta a hneipa Dâh” he a châ. He Dâh mianopazy eima hmâh thai khiahta cha, awnanopa ta ahnatlâh aw ta, sapa nata thlahpa kyh liata chhao byhna eima to aw. Awnanopa ta a zi awpa Dâh ataotuhpa cha Assembly a châpa vâta Assembly he eima awnanopa history a rohtuhpa chhao a châ, tah theipa a châ.

MEC Assembly ei (49)na cha March 5-8, 2020 noh liata Lialaipi (Vaihipi) liata hneipa a châ. Atakô he General Election kô a châpa hleikhô ta, he Assembly heta MEC history liata ngiâtlâhpa biepathlupa thokhazy a taopa vâta, cha kyh cha a pachhohna lâta ei vaw palâsa awpa a châ aw.

1. 2020-2024 term chhoh General Election liata atlypazy

Assembly Officers (2020-2022)

- | | |
|----------------------|---------------|
| (1) Rev. Victor Ve U | Moderator |
| (2) Rev. C. Sitlô | Dy. Moderator |

Church Officers (2020-2024)

- | | |
|--------------------------|---------------------------------|
| (1) Rev. Dr. L. B. Siana | General Secretary |
| (2) Rev. Dr. Sikhaw | Associate Gen. Secretary |
| (3) Rev. Dr. Zôdau | Exe. Secretary (Education) |
| (4) Rev. A. Rakhai | Exe. Secretary (Mission) |
| (5) Rev. F. Sa E Hmô | Exe. Secretary (Social Concern) |

Heads of Department (2020-2024)

- | | |
|-------------------|-------------------------------|
| (1) Machâ Zasaw | Treasurer |
| (2) Rev. Dr. Vâkô | Principal, LTC |
| (3) Rev. Lathai | Director, Evangelical Mission |
| (4) Pro. Salua | Secretary, KTP |
| (5) Pro. Vupar | Secretary, KNP |
| (6) Pro. Serô | Secretary, KHP |
| (7) Machâ Tai Au | Secretary, Service & Dev't |

Biatuhpa yna su raopa

- | | |
|--------------------|-----------|
| (1) Rev. Hrema | Patheitlâ |
| (2) Rev. Mah U | Ma U |
| (3) Rev. M. Khaomi | Rari |

(4) Rev. Thavaw	Parâh
(5) Rev. B. Khusa	Salyutlana
(6) Rev. Lechau	Lialaipi (Vaihpi)
(7) Rev. Hla Aung	Lialaita
(8) Rev. Ranao	Satu Ngephe
(9) Pro. Aung Myint	Chali
(10) Rev. Meilai	Chakhai Old
(11) Rev. Paul Thasieh	Sôsaih Old
(12) Rev. Matei	Tisi (V)
(13) Pro. Mela	Taubu A
(14) Rev. Sitlô	Sabyhpi
(15) Rev. Tlabie	Sabyh
(16) Rev. Meitha	Dawlei
(17) Pro. Bielehmô	Sapaw
(18) Rev. Vâtlô	Meisakôtla
(19) Rev. Bierachhôn	Lelai
(20) Rev. Ngehmôn	Ohmopi
(21) Rev. Khakôn	Leika
(22) Rev. Bievakhai	Leika
(23) Rev. Khaibie	Hakha
(24) Rev. Biehlôn	Thatla
(25) Rev. Bietlei	Kalay
(26) Rev. Beilawkhai	Matupi
(27) Rev. K. Zahne	Mindat
(28) Rev. Se U	Paletwa
(29) Rev. Kesawma	Sahmi
(30) Rev. Thaulei	Yangon

Oversea Pastors

(31) Rev. Chôn U	Maryland, USA
(32) Rev. Hratôn	North Carolina, USA
(33) Rev. Hietha	Indiana, USA
(34) Rev. Caleb	Tennessee, USA
(35) Rev. Aukôn	Georgia, USA
(36) Pro. Khaitha	Texas, USA
(37) Rev. Lechôntha	Melbourne, Australia
(38) Rev. Vebei	Kuala Lumpur, Malaysia

LTC liata Pachutuhpa, Chaplain nata a hropa

(39) Rev. Vazilai	LTC, Yangon
(40) Rev. Pahmo	LTC, Yangon
(41) Rev. Sikhei	LTC, Yangon
(42) Rev. Satu Ve U	Chaplain, COME, Lialaipi
(43) Ptr. Rose Mary	Chaplain, GCCF, Pakkoku
(44) Rev. Maiki	Director, TSD

Achu haipazy

(45) Rev. Phuhe	M.Th, Hong Kong
(46) Rev. Biekhai	M.Th, MIT, Yangon
(47) Pro. Ngônbeichhua	BD, Jorhat, India

2. Synod tahpa moh hmâna

“Synod” tahpa cha Krika reih *syn* (hmaohkha) nata *hodos* (a lâthlôh) tahpa tawhta avypa châ ta, a yzie cha “*hmaohkha ta atyhpakhyna lâthlôh*” tah theipa a châ. Awnanopa kyh liata cha Assembly tlyma, Council tlyma nahta yzie âlyu thlah haw. Ti nata tlah miakha tlyma, râhrina hneipa ta bia pachhaihpa chhoh liata a ypazy ‘hmaohkha ta atyhpakhyna, ahmaohpakhyna’ tahna a châ. Presbytery tahpa cha Presbyter (Machâ) tahpa tawhta avypa châ ta, awnanopa machâzy nahta azaona ahneipa bia/atyhna tahpa yize a hneipa a châ.

MEC Assembly ei (49na: 2020) ta kô hluhpi eima vaw hmâ tyhpa “Presbytery” tahpa he “Synod” tahpa ta a vaw pathlai. Cha kyh liata vote lapa a châ. Synod tahpa ta pathlai awpa a khohta vote (298), a parohpa hawhta Presbytery tahpa hmâ awpa a khohta vote (16) a châpa vâta 2020 March Assembly ta MEC history liata Synod tahpa ta a vaw pathlai haw.

Khâ hlâta Presbytery mia (4) ta eima vaopa awnanopa cha Synod (7) ta avaopa vaw châ ta, Synod (7)na cha Râhropa liata a ypa (Oversea) a châpa vâta eima râh liata Synod (6) ta he hawhta pachhaihpa a châ.

Synod 1: Patheitla bia, Ma U bia, Parâh bia, Râri bia, Heimata bia, Chyhu bia

Synod 2: Lialaipi bia, Lialaita bia, Satu Ngephe bia, Chali bia

Synod 3: Chakhai bia, Tisi bia, Sôsaih bia, Taubu bia

Synod 4: Sabyhpi bia, Sabyh bia, Dawlei bia, Sapaw bia

Synod 5: Ngephepi bia, Meisakôtla bia, Lelai bia, Ohmopi bia, Leika bia

Synod 6: Hakha bia, Matuhpi bia, Paletwa bia, Yangon bia

Synod 7: Rahropa liata a ypa (USA, Australia, Malaysia, Singapore)

Synod sâkha tawhta Assembly Executive Committee member mo (3) chyhu atlypa a châ.

Synod 1-6 taihta Chairman nata Secrerary-zy cha he hawhta ama châ.

Synod	Chairman	Secretary
Synod 1	Machâ Paikô	Rev. M. Khaomi
Synod 2	Machâ Chaehmô	Rev. Lechau
Synod 3	Machâ Bauhlau	Rev. Paul Thasieh
Synod 4	Machâ Vakô	Rev. Tlabie
Synod 5	Machâ Meisa	Rev. Bierachhô
Synod 6	Machâ Lai Ok	Rev. Khaibie

3. Administrative & Ministerial Committee hneina

1995 Constitution ta awnanopa chhoh liata hriatuhpazy kyh reituhpa “Ministerial & Personnel Committee” a padua. Office Bearers Meeting liana heta Presbytery vuytuapa mo (4) pahlaopa a châ. 2012 Sabyh Assembly liata Presbytery vuytuapa ahlaopa Office Bearers Meeting cha “Officers’ Council Meeting” tahpa Dâh liata pachopa a châ. Office Bearers cha Executive Secretary-zy rai patlapasaona deita a vaw châ.

2020 Assembly ta tao zie tyhpa thokha a vaw panano. Ministerial & Personnel Committee nata Officers’ Council Meeting he ama raihria âhnia kawpa, kheihawhpa kao liata ma cha âpathopa a ypa vâta “Administrative & Ministerial Committee” (AMC) tahpa moh ta pahlyhpa a châ. AMC liata kha hlâta Presbytery vuytuapa eima tah tyhpa (atahma cha Synod Chairman-zy) pahlaopa ama châ.

Chatawhta Office Bearers meeting he rai patlapazaona deita châ khao leipa ta, Assembly Officers, Church Officers deita member châ khao leipa ei ta, KTP, KNP, KHP, KPP, SDD Secretary zy chhao full member ta pahlaopa ama châ haw.

4. Chanô Ordination piena

- MEC Awnanopa ta chanô ordination pie awpa pakhâ vei. Pastor châta âhlâpa nata hria awpa ta Khazohpa ta sathaw athupazy ordination piepa a châ. Chanô Ordination piepa pakhana cha Rev. Maiki châ ta, 2006 March 12 noh ta Tisi Assembly liata Rev. C. Hniechei ta ordination a pie. Panona cha Rev. Sikhei châ ta, atakô 2020 March 8 noh ta Lialaipi (V) Assembly liata Rev. Satu Ve U ta ordination a piepa a châ.
- 2020 Assembly liata ordination mo (7), Pro. Pastor (1) nata Mission pastor (1) chahnaopa a châ (MEC/ASS-081, 084, 085/2020).

.....

HRIATUHPA THIEHPA LANA

2020 June 19 noh ta Administrative & Ministerial Committee meeting taopa châ ta, cha liata 2020 Assembly ta rai a pahypa liata a vaw saohpazy lana hneipa a châ. Cha liata he hawhta rai lapa ama châ.

- Home Evangelist:** 2020-2024 term châta Home Evangelist (4) su pahypa liata mo (14) ama vaw saoh. Chazy cha:

Sr	Moh	Khuh
1	Mch. Mawtha	Peite
2	Mch. Tlauphô	Salyu
3	Mch. Hratu	Ma U
4	Mch. Vabeikho	Tlôpi
5	Mch. Vabeilua	Parah
6	Mch. Niechha	Pasei
7	Mch. Hlauhao	Lôvai
8	Mch. Haotai	Lialaita N
9	Mch. Vebai	Chakhai (O)
10	Mch. Malô	Pintia New
11	Mch. Silao	Mala (Old)
12	Mch. Chhatlei	Ngephe
13	Mch. Zaudô	Lelai
14	Mch. Sipai	Hakha

Secret ballot ta vote lapa châ ta, atlypatlopazy cha Machâ Vabeikhoh (Tlôpi), Machâ Niechha (Pasei), Machâ Chhatlei (Ngephepi) nata Machâ Pinô Sipai (Hakha) zy ama châ.

- Clerk (LDC) post châta rai lapa :** Sabyhpi Office liata Cashier rai chakao awpa LDC post (1) pahypa châ ta, ary liata palasapazy a vaw saoh ei ta, chazy hry liata Ls. Khaisi New Moe (d/o Mch. Biekhai, Aru) lapa a châ.

Sr	Moh	Khuh
1	Khaisi Nwe Moe	Aru
2	Neizange	L. Station
3	Vangôkhai	Dawlei

4	Zarni Htwe	Lialaipi A
5	Ni Emi	Lialaita Old
6	Melikhai	Sabawngpi
7	Ngwe Htay Khaing	Lialaipi (V)

3. **Biehrai achu awpa:** 2020-2021 liata Biehrai achu awpa ta B.Th (1), BD/M.Div (1) post pahypa châ ta, ary liatazy ama vaw hiah. Chazy hry liata B.Th achu awpa ta Mr. Thawng Bawi Lian (Taubu) nata BD/M.Div achu awpa ta Mr. K. Thali (Tisi) zy lapa ama châ.

Sr	Raihiatuhpa	Khah	Achu awpa
1	Mr. Lian Hu	Leika	B.Th
2	Mr. Thawng Bawi Lian	Taubu A	B.Th
3	Mr. Vazatha	Teina	B.Th
4	Mr. Keles	Lialaipi (A)	B.Th
5	Mr. Vabeirôsa	Aru	B.Th
6	Mr. Vabeisia	Paletwa	B.Th
7	Mr. Kôteitha	Ngephepi	B.Th
8	Mr. Masela	Chakhai	BD/M.Div
9	Mr. K. Thali	Tisi	BD/M.Div

4. **Project Staff :** Service and Development Department ry liata Project Staff kô 2 châta rai pahypa liata a vaw hiahpa pakha deita châ ta, Lialaipi Vaihpi liata St. Mara Tobi lapa a châ.

.....

<p>MEC Hqrs., Office Lailenpi Liata Ary lâta Châbuzy chalei thei hawpa a châ.</p> <p>1. Krizyhpa Hlabu Ks. 4500/- 2. Chicheina Bu Ks. 2000/- 3. Chanôzy Thâtih Ks. 2500/- 4. Mission Noh Laichadaina Ks. 500/- 5. MEC Rule Ks. 2000/- 6. Mara Dictionary Ks.7000/- 7. MEC Chakaona Bu Ks.100/-</p>	<p>MYANMAR GENERAL ELECTION-2020 CHÂTA MARA CHYHSAPA CANDIDATE-ZY</p> <p><u>ENDP Party</u></p> <p>1. Mch. Tin Win (Tisi) Amyotha Candidate (Matupi) 2. St. Vabiehmôtu (Sabyhpi) No.II Pyine Candidate (Matupi) 3. Mch. Rawmâ (Peite) Amyotha Candidate (Paletwa)</p> <p><u>USDP Party</u></p> <p>1. Mch. Letlô (Sabyhpi) Pyittu Candidate (Matupi)</p> <p><u>NND Party</u></p> <p>1. Mch. M. Vahnie (Yangon) Amyotha Candidate (Matupi) <i>Achô palâsapa Candidate zydua he Matupi Township nata Paletwa Township tawhta a patlâ chy awpa a châ tahpa thâtih daopa a châ.</i></p>
---	---

.....

Local Sunday School Pachutuhpazy Pachuna Training (TOT) (June 22 to July 2, 2020)



Ei (49)Na MEC General Assembly.2020 Bie pathluna hawhta Sunday School-2020 Pachutuhpazy Pachuna (TOT) cha hlaotloh kawpa ta patlô theipa a châ. Cha pachuna cha Synod chy u ta pachupa châ ta, Local chy u tawhta tiama kawpa ta tlô theipa achâ nota thokha

Local-zy cha vaw tlô thei ma y. Pachuna cha Beginner, Primary, Junior nata Intermediate zy châ ta Sabawngpi Local, Ngephepi Local, Patheitlâ Local nata Lialaipi. A Local zy liata pachuna hneipa a châ. Avaw tlô thei Local Pachutuhpazy cha Sabawngpi Local liata mo (45),



Ngephepi Local liata mo (15), Patheitlâ Local liata mo (28) nata Lialaipi. A Local liata mo (43) châ ta, a zydua ta mo (131) tlô theipa a châ. A chuna daihti liata Local Pachutuhpazy tiama kaw ei ta kheita e eima pachu aw, eima chu awpa châbu ta âchhuanazy reipasianazy hneipa achâpa vâta a thôkheina eima a daoh hmeiseih pi ta achuna su Local zy tawhta deichhyna pha kawpazy eima daoh ngaita hra. Local Sunday School Pachutuhzy Pachuna Training (TOT) he Awnanopa ta hmialâ liata taopazaona hnei thei lyma awpa ta thla a chhâ ngâhaipa a châ.

